

符載

竹居狹廬

全唐文
卷六百九十一之六百九十一

符

竹居樓

全唐文
全唐文
全唐文

欽定全唐文卷六百九十目錄

符載 三

江陵陸侍御宅讌集觀張員外畫松石圖

上巳日陪劉尚書宴集北池序


九日陪劉中丞賈常侍宴合江亭序

中和節陪何大夫會讌序

鄂州何大夫創製夏亭詩序

甘子堂各賦一物詩序

送薛評事還晉州序



送袁校書歸秘書省序

送崔副使歸洪州幕府序

送盧端公歸巴陵兼往江夏謁何大夫序

送盧端公歸恒州序

送盧侍御史赴王令公幕序

夏日盧大夫席送敬侍御之南海序

鍾陵夏中送裴判官歸浙西序

潯陽歲暮送徐十九景威遊潞府序

荊州與楊衡說舊因送遊南越序

宣城送黎山人歸滁上瑯琊山居序

奉送良郢上人遊羅浮山序

說玉贈蘭陵蕭易簡遊三峽序

植松論

江陵府陟屺寺雲上人院壁張璪員外畫雙松讚

淮南節度使灞陵公杜佑寫眞讚

并序

劍南西川幕府諸公寫眞讚

并序

韓愈送高閑上人序

韓愈送高閑上人序

韓愈

韓愈送高閑上人序

韓愈送高閑上人序

韓愈送高閑上人序

韓愈送高閑上人序

韓愈送高閑上人序

欽定全唐文卷六百九十

符載 三

江陵陸侍御宅讌集觀張員外畫松石圖

六虛有精純美粹之氣其注人也爲太和爲聰明爲英才
爲絕藝自肇有生人至於我儕不得則已得之必騰凌覓
絕獨立今古用雖大小其神一貫尚書祠部郎張璪字文
通丹青之下抱不世絕儔之妙則天地之秀鍾聚於張公
之一端者耶初公盛名赫然居長安中好事者卿相大臣
旣迫精誠乃持權衡尺度之迹輸在貴室他人不得誣妄

而覩者也居無何謫官爲武陵郡司馬官閒無事從容大
府士君子由是往往獲其實焉荊州從事監察御史陸澧
字深源洎令弟曰灞曰潤曰淮皆以文行穎耀當世故舍
藻蘊奇之士多游其門焉秋七月深源陳譙宇下華軒沈
沈樽俎靜嘉庭篁霽景疎爽可愛公天縱之思歟有所詣
暴請霜素願撫奇蹤主人奮裾嗚呼相和是時座客聲聞
士凡二十四人在其左右皆岑立注視而觀之員外居中
箕坐鼓氣神機始發其駭人也若流電激空驚飈戾天摧
挫幹掣撓霍瞥列毫飛墨噴捽掌如裂離合惝恍忽生怪

狀及其終也則松鱗皴石巉巖水湛湛雲窈眇投筆不起
爲之四顧若雷雨之澄霽見萬物之情性觀夫張公之藝
非畫也眞道也當其有事已知夫遺去機巧意冥元化而
物在靈府不在耳目故得於心應於手孤姿絕狀觸毫而
出氣交冲漠與神爲徒若忖短長於隘度算妍媸於陋目
凝觚舐墨依違良久乃繪物之贅疣也寧置於齒牙間哉
嗚呼由基之弧矢造父之車馬內史之筆札員外之松石
使其術可授雖執鞭之賤吾亦師之如不可求從吾所學
則知夫道精藝極當得之於元悟不得之於糟粕眾君子

以爲是事也是會也雖蘭亭金谷不能尚此或闕歌頌取
羞前人命鄙夫首敘諸公得揮其宏思耳

上巳日陪劉尚書宴集北池序

才智宏傑者其人尊政教易簡者其民泰時節和暢者其
游盛地形盤鬱者其宴雄我尚書劉公挺天姿之英特采
人心之愉樂乘上巳之暄淑趣北池之汗漫操四駕騰百
祥皇皇煜煜氣象飄動眞高會也况乎九天之澤滂沱下
澍新握龍節保寧坤維苟或風流褊儉不耀是則欲顛頤
寵榮也豈承荷錫命之意乎巖巖西蜀古稱天府之奧也

江山數千里羌蠻萬餘落歲時風俗豪侈凡所好尚奇偉
譎怪遭值此際得攄胸襟故尤爲壯觀矣先期旬日也嚴
經術洗涯岸洞篁篠熾臺榭有事之辰也擁幢蓋揖賓客
寅及於近郊卯及於北池其降車也鼙鼓發登舟也絲桐
揭解纜也百戲作覽水府摧江籬叱天吳拉馮夷躍龜魚
騰蛟螭召琴高嘯宓妃引蓬壺以迴泊若雲蔚而霞帔一
何壯也及乎耳煩目劇綿趣靜境稍自引去於空濶水波
不動四羅郡山簪裾坐於天上思慮遊於象表又何曠也
觀夫水嬉之倫儲精蓄銳天高日晏思奮餘勇實有赤縣

兩爲朋曹獻奇較藝鉤索勝負於是劃萬人之浩擾豁一
路之清泚南北穩徹中無飛鳥爰挂錦彩從風爲標爛然
長虹橫拖空碧乃計才力量遠邇一號令雷鼓而飛千橈
動萬夫呼閃電流於目眚羽翼生於肘下觀者山立陰助
鬪志肺腸爲之沸渭草樹爲之偃悴揭竿取勝揚旌而旋
觀其猛厲之氣騰陵之勢崇山可破也青天可登也若使
移於摧堅陷陣之地寧有對宇宙乎夫文質殊塗古今異
宜君子作事得時也是都也有軍旅焉有南詔焉有西戎
焉尚或以清流激湍一觴一詠爲賓客之娛者是不知變

也而識者咍之其觀一時之能事成千古之休烈在今辰也豈與夫永和少長咸集同日而言哉載自顧薄劣塵厠下介謬處陳璋之任被命首敘敢逡巡乎請賦八韻以耀蘭亭諸子也先是故太師韋公因是令節課賓寮賦詩迺取諸黃裳以爲韻今尚書繼之以青蓋欲使其五色相宣耳

九日陪劉中丞賈常侍宴合江亭序

井絡萬方之奧區也重陽四序之佳節也合江一都之奇勝也張此筵者中丞劉公焉監此軍者常侍賈公焉是亭

鴻盤如山橫架赤霄廣場在下砥平雲截而東西南北翼
然也場中羅崇牙大旆亭上列雕盤玉笋主人與賓朱紫
爛然相與峩冠揖讓而臨之雷鼓震動壺觴波湧山川風
景凌軒入坐地形勝天氣嘉人心洽三者旣極遂成歡娛
不知醉之無從也夫和樂之在人心也未嘗不激於衷而
形於外此自然之數是言也其故何哉禮曰有爲而爲之
曩者藩隅變故主帥殂歿而子繼弟及者有之毒民殺吏
者有之逐將攘位者有之兵戈一動羶腥數歲今坤維禍
起太尉公薨落山川之所控引兵車之所雜蹂蕃蠻之所

連屬師漏於涓滴釁成於波瀾安危之計懸在絲髮我常
侍沈斷元機發如飈馳以眇眇之力移山邱之勢我中丞
聰明英傑動與神遇承要約當談笑間萬形施張已在靈
府遂乃推大誠布大賞誅橫猾拔雋異息老稚洗故瑕一
日而聲作浹旬而恩被盈月而政成森然萬戶與令清淨
麾幢之所至也自耆耄至於童孺瞻其馬首拜其玉顏唯
恐其不爲父母也故茲會之宴賞今日之愉樂與彼登桓
景之山落孟嘉之帽飲菊酒佩絳囊者豈同日而言哉於
戲非常侍無以康護全蜀非中丞無以恢建盛烈能罷二

美輝映一時若使載事者聆而書之可以聳忠良而驚奸
慝也載忝幕府之舊謬親文翰憑良會之奇勝來羣情之
踴躍敢竭思慮紀其風流至於登臨眺聽之興烟霞草樹
之狀卽存乎大雅六韻之什此無備焉

中和節陪何大夫會讌序

中和王節也萬國承之樂洪慶也夫天地之大德曰生發
生之盛氣曰春春之於孟也萌動而方微於季也發泄而
過強唯仲春木德乃茂沃生人之愷樂洗萬物之枯槁當
三陽之正中凝四氣之太和以正星鳥以推律度五年春

皇帝負黼宸臨前殿酌天心之旻美順人情之煦嫗啟襟
宸於高瓊建嘉名於振古遂下明詔詔天下以每年春二
月朔旦爲中和之節焉凡八紘九州舟車所至之域莫不
嚮風蹈躍承順帝則卽今日之會我岳鄂連帥御史大夫
何公蓋所以祇明詔宣德教而歡萬民也夫景不和無以
破昏蒙之氣地不雄無以壯光華之會且觀夫廣場削平
空迴無涯黃鶴前峙以崢嶸大江旁注而逶迤朝之日晴
陽始昇鏡清無塵高楊如烟拂冠垂紳主人乃揖乎英僚
上介洎簪裾耆老之客相與羅拜於北向已而敘登於阼